

مصدق كذبك

هاعمل إني مصدق كذبك
وإنك إنتي خلاص نسياني
إني خرجت خلاص من قلبك
وإن في غيري حل مكاني
هاعمل إني مصدق جداً
وابعد نفسي بكل سهوله
يمكن أقول عمري ما حبيبتك
واكذب برضه الكذب الأولي
وأفضل أقول لنفسي كرهتك
مش قادر اشوفك حتي ثواني
وارجع أحلم حلم جديد
أجمل م الي انتي خنقتيه
أحلم ثاني بوعد جديد
غير وعدك الي سحبتيه

و ارجع أدور أدور أدور
أتارينى بدور عنك تانى
و افضل الومك كل ما اقابلك
و عيونك تهرب من عيني
افضل أقولك إني بحبك
و إن غرامك لسه كاويني
لسه بحبك زي الأول
لكن انتي راضيه بهواني
هاعمل اني مصدق كذبك
بس أنا عارف كله كلام
بتحبينى أنا عارف قلبك
و تصدينى عشان أوهام
لو حكمتي ما بينا مشاعرك
هتقولك القسوه حرام
ليه القسوه بتغلب حبك
و تسيبي قلبك بيعاني
أوعي الكذب يطول حبه
أحسن أصدق و ابعد جد

و يضيق الشوق حبه بحبه
و تعودى قلبي على البعد
و ميفضلش ما بينا محبه
ننسى الشوق و يضيق الوعد
ساعتها هاصدق كل كلامك
و أعرف صدقك فاق الحد
عارف أنى مكونتش حلمك
و أنى حلمتك بعد أوانى

